## 0.0.1kālāmāsuttam

- ekam samayam bhaqavā kosalesu cārikam caramāno mahatā bhikkhusanghena saddhim yena kesaputtam nāma kālāmānam nigamo tadavasari. sum kho kesaputtivā kālāmā samano khalu bho gotamo sakvaputto sakvakulā pabbajito kesaputtam anuppatto, tam kho pana bhavantam<sup>1</sup> gotamam evam kalyāno kittisaddo abbhuggato: iti'pi so bhagavā araham sammāsambuddho vijjācaranasampanno sugato lokavidū anuttaro purisadammasārathī satthā devamanussānam buddho bhagavā. so imam lokam sadevakam samārakam sabrahmakam sassamanabrāhmanim pajam sadevamanussam sayam abhiññā sacchikatvā pavedeti, so dhammam deseti ādikalyānam majjhekalyānam pariyosānakalyānam sāttham sabyañjanam kevalaparipunnam parisuddham brahmacariyam pakāseti. sādhu kho pana tathārūpānam arahatam dassanam hotī"ti.
- atha kho kesaputtiyā kālāmā yena bhagavā tenupasankamimsu. upasankamitvā appekacce bhagavantam abhivādetvā ekamantam nisīdimsu. appekacce bhagavatā saddhim sammodimsu, sammodanīvam katham sārānīvam vītisāretvā ekamantam nisīdimsu. appekacce yena bhagavā tenañjalim paṇāmetvā ekamantam nisīdimsu. appekacce nāmagottam sāvetvā ekamantam nisīdimsu appekacce tunhībhūtā ekamantam nisīdimsu. ekamantam nisinnā kho kesaputtiyā kā-

<sup>&</sup>lt;sup>1</sup>bhagavantam - sīmu.

lāmā bhagavantaṃ etadavocuṃ: santi bhante eke samaṇabrāhmaṇā kesaputtaṃ āgacchanti, te sakaññeva vādaṃ dīpenti, jotenti, paravādaṃ pana² khuṃsenti, vambhenti, opapakkhiṃ³ karonti, paribhavanti. apare'pi bhante eke samaṇabrāhmaṇā kesaputtaṃ āgacchanti, te'pi sakaññeva vādaṃ dīpenti, jotenti, paravādaṃ pana khuṃsenti, vambhenti, opapakkhiṃ karonti, paribhavanti. tesaṃ no bhante amhākaṃ hoteva kaṅkhā, hoti vicikicchā: ko su nāma imesaṃ bhavantānaṃ samaṇabrāhmaṇānaṃ saccaṃ āha, ko musā'ti.

- 3. alaṃ hi vo kālāmā kaṅkhituṃ alaṃ vicikicchituṃ, kaṅkhanīye ca pana vo ṭhāne vicikicchā uppannā, etha tumhe kālāmā mā anusasavena, mā paramparāya, mā itikirāya, mā piṭakasampadānena, mā takkahetu, mā nayahetu, mā ākāraparivitakkena, mā diṭṭhinijjhānakkhantiyā, mā bhabbarūpatāya, mā samaṇo no garū'ti. yadā tumhe kālāmā attanā'va jāneyyātha: ime dhammā akusalā, ime dhammā sāvajjā, ime dhammā viññūgarahitā, ime dhammā samattā samādinnā ahitāya dukkhāya saṃvattantī'ti: atha tumhe kālāmā pajaheyyātha.
- **4.** taṃ kimmañnatha kālāmā lobho purisassa ajjhattaṃ uppajjamāno uppajjati hitāya vā ahitāya vā'ti?
- 5. ahitāya bhante.

<sup>&</sup>lt;sup>2</sup>parappavādam - machasam

<sup>&</sup>lt;sup>3</sup>omakkhīm-machasam

**6.** luddho panā'yaṃ kālāmā purisapuggalo lobhena abhibhūto pariyādinnacitto pāṇampi hanti<sup>4</sup> adinnampi ādiyati. paradārampi gacchati, musāpi bhaṇati, parampi tathattāya samādapeti, yaṃ sa hoti dīgharattaṃ ahitāya dukkhāyā'ti.

## 7. evam bhante.

- 8. tam kimmañnatha kālāmā doso purisassa ajjhattam uppajjamāno uppajjati hitāya vā ahitāya vā'ti.
- 9. ahitāya bhante.
- 10. duṭṭho panā'yaṃ kālāmā purisapuggalo dosena abhibhūto pariyādinnacitto pāṇampi hanti adinnampi ādiyati. paradārampi gacchati, musāpi bhaṇati, parampi tathattāya samādapeti, yaṃ sa hoti dīgharattaṃ ahitāya dukkhāyā'ti.
- 11. evam bhante.
- **12.** taṃ kimmaññatha kālāmā moho purisassa ajjhattaṃ uppajjamāno uppajjati hitāya vā ahitāya vā'ti.
- **13.** ahitāya bhante.

<sup>&</sup>lt;sup>4</sup>bhananti - machasam, syā.

- 14. mūļho panāyam kālāmā purisapuggalo mohena abhibhūto pariyādinnacitto pāṇampi hanti adinnampi ādiyati. paradārampi gacchati, musāpi bhaṇati, parampi tathattāya samādapeti, yam sa hoti dīgharattam ahitāya dukkhāyā'ti.
- 15. evam bhante.
- **16.** taṃ kimmaññatha kālāmā ime dhammā kusalā vā akusalā vā'ti?
- 17. akusalā bhante.
- 18. sāvajjā vā anavajjā vā'ti?
- 19. sāvajjā bhante.
- 20. viññūgarahitā vā viññuppasatthā vāti?
- 21. viññūgarahitā bhante.
- **22.** samattā samādinnā ahitāya dukkhāya saṃvattanti no vā kathaṃ vā hettha hotī'ti?
- **23.** samattā bhante samādinnā ahitāya dukkhāya saṃvattanti evaṃ ne hettha hotī'ti.

- 24. iti kho kālāmā yantam avocumha. etha tumhe kālāmā mā anussavena, mā paramparāya, mā itikirāya, mā piṭakasampadānena, mā takkahetu, mā nayahetu, mā ākāraparivitakkena, mā diṭṭhinijjhānakkhantiyā, mā bhabbarūpatāya, mā samaņo no garū'ti. yadā tumhe kālāmā attanā'va jāneyyātha: ime dhammā akusalā, ime dhammā sāvajjā, ime dhammā viññūgarahitā, ime dhammā samattā samādinnā ahitāya dukkhāya samvattantī'ti. atha tumhe kālāmā pajaheyyāthā'ti iti yantam vuttam idametam paṭicca vuttam.
- 25. etha tumhe kālāmā mā anussavena, mā paramparāya, mā itikirāya, mā piṭakasampadānena, mā takkahetu, mā nayahetu, mā ākāraparivitakkena, mā diṭṭhinijjhānakkhantiyā, mā bhabbarūpatāya, mā samaņo no garū'ti. yadā tumhe kālāmā attanā'va jāneyyātha, ime dhammā kusalā, ime dhammā anavajjā, ime dhammā viñnuppasatthā, ime dhammā samattā samādinnā hitāya sukhāya saṃvattantī'ti. atha tumhe kālāmā upasampajja vihareyyātha.
- **26.** tam kimmaññatha kālāmā alobho purisassa ajjhattam uppajjamāno uppajjati hitāya vā ahitāya vā'ti.
- 27. hitāya bhante.
- 28. aluddho panāyam kālāmā purisapuggalo lobhena anabhibhūto apariyādinnacitto nevapānam hanti, na

adinnam ādiyati, na paradāram gacchati, na musā bhanati, parampi tathattāya samādapeti, yam sa hoti dīgharattam hitāya sukhāyā'ti.

- 29. evam bhante.
- **30.** tam kimmaññatha kālāmā adoso purisassa ajjhattam uppajjamāno uppajjati hitāya vā ahitāya vā'ti;
- 31. hitāya bhante.
- 32. aduţţho panāyam kālāmā purisapuggalo dosena anabhibhūto apariyādinnacitto nevapāṇam hanti na adinnam ādiyati, na paradāram gacchati, na musā bhaṇati, parampi tathattāya samādapeti. yam sa hoti dīgharattam hitāya sukhāyā'ti.
- 33. evam bhante.
- **34.** tam kimmaññatha kālāmā amoho purisassa ajjhattam uppajjamāno uppajjati hitāya vā ahitāya vā'ti?
- 35. hitāya bhante.
- **36.** amūļho panāyam kālāmā purisapuggalo mohena anabhibhūto apariyādinnacitto nevapāṇam hanti na

adinnam ādiyati, na paradāram gacchati, na musā bhanati, parampi tathattāya samādapeti. yam sa hoti dīgharattam hitāya sukhāyā'ti.

- 37. evam bhante.
- **38.** taṃ kimmañnatha kālāmā ime dhammā kusalā vā akusalā vā'ti?
- 39. kusalā bhante.
- 40. sāvajjā vā anavajjā vā'ti?
- 41. anavajjā bhante.
- **42.** viññūgarahitā vā viññuppasatthā vāti?
- 43. viññuppasatthā bhante.
- **44.** samattā samādinnā hitāya sukhāya saṃvattanti no vā katham vā hettha hotī'ti?
- **45.** samattā bhante samādinnā hitāya sukhāya samvattanti evam ne hettha hotī'ti.

- 46. iti kho kālāmā yantaṃ avocumha: etha tumhe kā-lāmā mā anussavena, mā paramparāya, mā itikirāya, mā piṭakasampadānena, mā takkahetu, mā nayahetu, mā ākāraparivitakkena, mā diṭṭhinijjhānakkhantiyā, mā bhabbarūpatāya, mā samaṇo no garū'ti. yadā tumhe kālāmā attanā'va jāneyyātha: ime dhammā kusalā, ime dhammā anavajjā, ime dhammā viñnuppasatthā, ime dhammā samattā samādinnā hitāya sukhāya saṃvattantī'ti. atha tumhe kālāmā upasampajja vihareyyāthā'ti iti yantaṃ vuttaṃ idametaṃ paṭicca vuttaṃ.
- 47. sa kho so kālāmā ariyasāvako evam vigatābhijjho vigatābyāpādo asammūļho sampajāno patissato mettāsahagatena cetasā ekam disam pharitvā viharati. tathā dutiyam, tathā tatiyam, tathā catutthim, iti uddhamadho tiriyam sabbadhi sabbattatāya sabbāvantam lokam mettāsahagatena cetasā vipulena mahaggatena appamāņena averena abyāpajjhena pharitvā viharati.
- 48. karuṇāsahagatena cetasā ekaṃ disaṃ pharitvā viharati. tathā dutiyaṃ, tathā tatiyaṃ, tathā catutthiṃ, iti uddhamadho tiriyaṃ sabbadhi sabbattatāya sabbāvantaṃ lokaṃ karuṇāsahagatena cetasā vipulena mahaggatena appamāṇena averena abyāpajjhena pharitvā viharati.
- **49.** muditāsahagatena cetasā ekam disam pharitvā viharati. tathā dutiyam, tathā tatiyam, tathā catutthim, iti uddhamadho tiriyam sabbadhi sabbattatāya

sabbāvantam lokam muditāsahagatena cetasā vipulena mahaggatena appamāņena averena abyāpajjhena pharitvā viharati.

- 50. upekkhāsahagatena cetasā ekam disam pharitvā viharati, tathā dutiyam tathā tatiyam, tathā catutthim, iti uddhamadho tiriyam sabbadhi sabbattatāya sabbāvantam lokam upekkhāsahagatena cetasā vipulena mahaggatena appamāņena averena abyāpajjhena pharitvā viharati.
- **51.** sa kho so kālāmā ariyasāvako evam averacitto evam abyāpajjhacitto evam asankiliţţhacitto evam visuddhacitto tassa diţţheva dhamme cattāro assāsā adhigatā honti:
- **52.** sace kho pana atthi paro loko, atthi sukaṭaduk-kaṭānaṃ kammānaṃ phalaṃ vipāko, ṭhānamahaṃ kā-yassa bhedā parammaraṇā sugatiṃ saggaṃ lokaṃ upa-pajjāmī'ti, ayamassa pathamo assāso adhigato hoti.
- 53. sace pana kho natthi paro loko, natthi sukaṭaduk-kaṭānaṃ kammānaṃ phalaṃ vipāko, idāhaṃ diṭṭheva dhamme averaṃ abyāpajjhaṃ anīghaṃ sukhaṃ attānaṃ pariharāmīti, ayamassa dutiyo assāso adhigato hoti.
- **54.** sace kho pana karoto kariyyati pāpam, na kho panāham kassaci pāpam cetemi, akarontam kho pana

maṃ pāpaṃ kammaṃ kuto dukkhaṃ phusissatī'ti ayamassa tatiyo assāso adhigato hoti.

- **55.** sace kho pana karoto na kariyyati pāpam, idāham ubhayene'va visuddham attānam samanupassāmī'ti ayamassa catuttho assāso adhigato hoti.
- **56.** sakho so kālāmā ariyasāvako evam averacitto evam abyāpajjhacitto evam asankiliţţhacitto, evam visuddhacitto tassa diţţhe'va dhamme ime cattāro assāsā adhigatā hontī'ti?
- **57.** evametam bhagavā, evametam sugato, sakho so bhante ariyasāvako evam averacitto evam abyāpajjhacitto evam asankiliṭṭhacitto, evam visuddhacitto tassa diṭṭheva dhamme cattāro assāsā adhigatā honti.
- **58.** sace kho pana atthi paro loko, atthi sukaṭaduk-kaṭānaṃ kammānaṃ phalaṃ vipāko, ṭhānamahaṃ kā-yassa bhedā parammaraṇā sugatiṃ saggaṃ lokaṃ upa-pajjāmī'ti, ayamassa paṭhamo assāso adhigato hoti.
- **59.** sace pana kho natthi paro loko, natthi sukaṭaduk-kaṭānaṃ kammānaṃ phalaṃ vipāko, idāhaṃ diṭṭheva dhamme averaṃ abyāpajjhaṃ anīghaṃ sukhaṃ attānaṃ pariharāmīti, ayamassa dutiyo assāso adhigato hoti.

- **60.** sace kho pana karoto kariyyati pāpam, na kho panāham kassaci pāpam cetemi, akarontam kho pana mam pāpam kammam kuto dukkham phusissatī'ti ayamassa tatiyo assāso adhigato hoti.
- **61.** sace kho pana karoto na kariyyati pāpam, idāham ubhayene'va visuddham attānam samanupassāmī'ti ayamassa catuttho assāso adhigato hoti.
- **62.** sa kho so bhante ariyasāvako evam averacitto evam abyāpajjhacitto evam asankiliţţhacitto evam visuddhacitto tassa diţţheva dhamme ime cattāro assāsā adhigatā hontīti.
- 63. abhikkantam bhante, abhikkantam bhante, gotama, seyyathāpi bhante nikkujjitam vā ukkujjeyya, paticchannam vā vivareyya, mūļhassa vā maggam ācikkheyya, andhakāre vā telapajjotam dhāreyya, cakkhumanto rūpāni dakkhintīti. evamevam bhotā gotamena anekapariyāyena dhammo pakāsito. ete mayam bhante bhavantam gotamam saraṇam gacchāma, dhammañca bhikkhusaṅghañca. upāsake no bhavam gotamo dhāretu ajjatagge pāṇupete saraṇam gate'ti.